



«ՀԱՍՏԱՏՈՒՄ ԵՄ»

ՀՀ ԳԱԱ Մ.Քոթանյանի անվան
տնտեսագիտության ինստիտուտի տնօրեն
տնտեսագիտության թեկնածու, դոցենտ

Մ.Գ.Մանուչարյան
13 հունվարի 2025թ.

ԿԱՐԾԻՔ ԱՌԱՋԱՏԱՐ ԿԱԶՄԱԿԵՐՊՈՒԹՅԱՆ

Անի Արթուրի Աղաբաբյանի «Բյուջետային քաղաքականության կատարելագործման ուղիները ՀՀ-ում» թեմայով ատենախոսության վերաբերյալ, ներկայացված Ը.00.02 «Տնտեսության, նրա ոլորտների տնտեսագիտություն և կառավարում» մասնագիտությամբ տնտեսագիտության թեկնածուի գիտական աստիճանի հայցման համար

Մասնակցում էին՝ Մերի Մանուչարյան՝ տնտեսագիտ. թեկնածու, դոցենտ, Լիանա Խաչատրյան՝ տնտեսագիտ. թեկնածու, դոցենտ, Եվգենյա Հակոբյան՝ տնտեսագիտ. թեկնածու, Ռոբերտ Սարինյան՝ տնտեսագիտ. դոկտոր, պրոֆ., Աշոտ Մարկոսյան՝ տնտեսագիտ. դոկտոր, պրոֆ., Բելլա Գաբրիելյան՝ տնտեսագիտ. թեկնածու, դոցենտ, Գևորգ Հարությունյան՝ տնտեսագիտ. թեկնածու, Գրիգոր Մանուկյան՝ տնտեսագիտ. թեկնածու, դոցենտ, Շողեր Պողոսյան՝ տնտեսագիտ. թեկնածու, Ստեփան Պապիկյան՝ տնտեսագիտ. թեկնածու, Տաթևիկ Շահինյան՝ տնտեսագիտ. թեկնածու:

ԱՏԵՆԱԽՈՍՈՒԹՅԱՆ ԹԵՄԱՅԻ ԱՐԴԻԱԿԱՆՈՒԹՅՈՒՆԸ

Շուկայական հարաբերությունների անցած ժամանակահատվածում իրականացված բյուջետային քաղաքականությունը դրական ձեռքբերումներով հանդերձ, ունեցել է նաև մի շարք բացթողումներ և չի կարողացել ապահովել իրեն վերապահված գլխավոր խնդրի՝ հասարակության պահանջմունքների բավարարման և պետության ծախսային պարտավորությունների լիարժեք և համապարփակ կատարման լուծումը: Նման իրավիճակի պատճառներն ունեն ինչպես օբյեկտիվ, այնպես էլ սուբյեկտիվ բնույթ՝ պայմանավորված օրենսդրաիրավական, ինստիտուցիոնալ և մի շարք այլ գործոններով: Ներկայումս ՀՀ-ում իրականացվող բյուջետային

քաղաքականությունը դեռևս թույլ չի տալիս ապահովել պետության սոցիալ-տնտեսական կարիքների ամբողջական բավարարում և բնակչության սոցիալական բարեկեցության բարձրացում: Դա հիմնականում պայմանավորված է երկրի ֆինանսական հնարավորությունների և ծախսային պահանջմունքների անհամապատասխանությամբ: Այս առումով, հատկապես ֆինանսական սուղ միջոցների պայմաններում առաջին պլան են մղվում բյուջետային քաղաքականության կատարելագործման և բյուջետային միջոցների օգտագործման արդյունավետության բարձրացման խնդիրները: Ակնհայտ է, որ պետության գործառույթների շրջանակի ընդլայնումը պահանջում է բյուջետային քաղաքականության բարելավում, բյուջետային ծախսերի ծավալների շարունակական ավելացում և դրանց ուղղությունների ու կառուցվածքի վերանայում:

Տնտեսական զարգացման ներկա փուլում, ելնելով ՀՀ տնտեսության երկարաժամկետ զարգացման հրամայականից, բյուջետային քաղաքականության կատարելագործմանն ուղղված մոտեցումների մշակումն ու գործնական կիրառումը ձեռք է բերել առանցքային նշանակություն, ինչով էլ պայմանավորված են թեմայի արդիականություն ու հրատապությունը:

ՀԵՏԱԶՈՏՈՒԹՅԱՆ ՆՊԱՏԱԿԸ ԵՎ ԽՆԴԻՐՆԵՐԸ

Հետազոտության հիմնական նպատակը Հայաստանի Հանրապետությունում բյուջետային քաղաքականության կատարելագործմանն ուղղված մոտեցումների և առաջարկությունների մշակումն է, որին հասնելու համար աշխատանքում դրվել և լուծվել են հետևյալ խնդիրները՝

- ուսումնասիրել բյուջեի սոցիալ-տնտեսական բովանդակությունը և դերը տնտեսության պետական կարգավորման գործընթացում,
- ուսումնասիրել բյուջետային քաղաքականության էությունն ու հիմնական խնդիրները, վերլուծել բյուջետային ծախսերի տեսական հիմքերը և դրանց արդյունավետության ապահովման հիմնահարցերը,
- վերլուծել Հայաստանի Հանրապետությունում բյուջետային քաղաքականության օրենսդրաիրավական և կազմակերպական հիմքերը, բացահայտել դրա իրականացման հիմնախնդիրները և դրա արդյունավետության վրա ազդող գործոնները ՀՀ-ում,
- ուսումնասիրել բյուջետային ծախսերի հիմնավորվածության ապահովման խնդիրները,

- մշակել բյուջետային քաղաքականության կատարելագործման հիմնական ուղղությունները Հայաստանի Հանրապետությունում:

ԱՇԽԱՏԱՆՔԻ ԳԻՏԱԿԱՆ ՆՈՐՈՒՅԹԸ

Աշխատանքի հիմնական գիտական արդյունքները, որոնք պայմանավորված են հետազոտությունում առաջադրված խնդիրների լուծմամբ, կայանում են հետևյալում.

- բյուջետային համակարգի գործունեությունը կանոնակարգող օրենսդրական դաշտի համակողմանի վերլուծության արդյունքում բացահայտվել են առկա բացթողումները և թերությունները, ներկայացվել են առաջարկություններ՝ ուղղված բյուջետային քաղաքականության կատարելագործմանը,
- բյուջետային ծախսերի տեսական հիմքերի համակողմանի վերլուծության արդյունքում մշակվել են բյուջետային ծախսերի արդյունավետության ապահովման հիմնական ուղիները և դրա գնահատման մեթոդաբանական հիմքերը,
- առաջարկվել է բյուջետային ծախսերի հիմնավորվածությունը դիտարկել որպես բյուջետային համակարգի հիմքում դրվող սկզբունք, բացահայտվել և համակարգվել են բյուջետային ծախսերի հիմնավորվածության ապահովման հիմնախնդիրները, առաջարկվել է դրանց լուծմանն ուղղված միջոցառումների համալիր՝ բյուջետային ծախսերի պլանավորման և իրականացման փուլերում հաջորդական քայլերի ներկայացմամբ,
- մշակվել է բյուջետային ծախսերի պլանավորման բազմափուլ մոտեցում՝ սոցիալ-տնտեսական զարգացման ռազմավարական նպատակների հիման վրա բյուջետային ծախսերի գերակայությունների սահմանումից մինչև բյուջետային ծախսերի իրականացումն ապահովող իրավական և մեթոդական ապահովվածության ուղիների ամրագրմամբ:

ԱՏԵՆԱԽՈՍՈՒԹՅԱՆ ՀԻՄՆԱԿԱՆ ԲՈՎԱՆԴԱԿՈՒԹՅՈՒՆԸ

Ատենախոսության **ներածությունում** հիմնավորված է թեմայի արդիականությունը, ներկայացված են հետազոտության նպատակներն ու խնդիրները, ուսումնասիրության օբյեկտը և առարկան, տեսամեթոդաբանական և տեղեկատվական հիմքերը, ստացված արդյունքները և նորույթները, արդյունքների գիտագործնական

նշանակությունը, հետազոտության շրջանակներում կատարված հրապարակումները, ինչպես նաև հետազոտության կառուցվածքը:

Ատենախոսության առաջին՝ **«Բյուջետային քաղաքականության տեսական և մեթոդական հիմքերը»** գլխում ուսումնասիրվել է բյուջեի սոցիալ-տնտեսական բովանդակությունը և դերը տնտեսության պետական կարգավորման գործընթացում, քննարկվել են բյուջետային քաղաքականության էությունն ու հիմնական խնդիրները և բյուջետային ծախսերի արդյունավետության ապահովման հիմնահարցերը:

Ատենախոսության երկրորդ՝ **«Բյուջետային քաղաքականության իրականացման հիմնախնդիրները ՀՀ-ում»** գլխում ուսումնասիրվել են Հայաստանի Հանրապետությունում բյուջետային քաղաքականության օրենսդրաիրավական ապահովվածության հիմքերը, վերլուծության են ենթարկվել դրա վրա ազդող գործոնները, ինչպես նաև բյուջետային ծախսերի հիմնական ուղղությունները և դինամիկան:

Ատենախոսության երրորդ՝ **«Բյուջետային քաղաքականության կատարելագործման ուղղությունները ՀՀ-ում»** գլուխը նվիրված է բյուջետային ծախսերի պլանավորման կատարելագործման ուղիների, դրանց արդյունավետության և հիմնավորվածության ապահովման հիմնական մոտեցումների մշակմանը:

Հետազոտության արդյունքների վերլուծությունը թույլ է տալիս կատարելու եզրահանգումներ և առաջարկություններ, որոնք ամփոփված են ատենախոսության **«Եզրակացություններ և առաջարկություններ»** բաժնում:

ԴԻՏՈՂՈՒԹՅՈՒՆՆԵՐ ԱՇԽԱՏԱՆՔԻ ՎԵՐԱԲԵՐՅԱԼ

Ինչպես ցանկացած գիտական աշխատանք, սույն ատենախոսությունը ևս զերծ չէ որոշակի թերություններից, որոնցից կարևորել ենք հետևյալները.

1. Ատենախոսության հեղինակն իր առջև խնդիր է դրել վերլուծել Հայաստանի Հանրապետությունում բյուջետային քաղաքականության օրենսդրաիրավական և կազմակերպական հիմքերը, բացահայտել դրա իրականացման հիմնախնդիրները և դրա արդյունավետության վրա ազդող գործոնները ՀՀ-ում: Մինչդեռ աշխատանքում չկա որևէ անդրադարձ բյուջետային քաղաքականության հիմնարար իրավական ակտ հանդիսացող «Պետական բյուջեի մասին», ինչպես նաև «Պետական պարտքի մասին» օրենքներին: Փոխարենը՝ աշխատանքի 2.1՝ Բյուջետային քաղաքականության օրենսդրաիրավական ապահովվածության հիմքերը ենթահարցում հեղինակը

բացառապես քննարկել է «ՀՀ Բյուջետային համակարգի մասին» օրենքի առանձին հոդվածներ:

2. Ատենախոսության 20-22 էջերում հեղինակը նշել է, որ բյուջետային քաղաքականության հիմնական ցուցանիշներ են հանդիսանում բյուջետային ծախսեր/ՀՆԱ, բյուջետային դեֆիցիտ/ՀՆԱ, պետական պարտք/ՀՆԱ ցուցանիշները: Աշխատանքի գիտագործնական նշանակությունն էականորեն կբարձրանար, եթե հեղինակն իր վերլուծություններում անդրադառնար դրանց: Հեղինակը նաև նշում է, որ ՀՆԱ-ի կրճատման հետևանքով նվազում են պետական սեփականության կառավարումից ստացվող մուտքերը, սակայն աշխատանքում չկա որևէ հիմնավորում նշվածի առումով:
3. Հեղինակի կողմից գիտական նորոյթ ներկայացվող կետերի շարադրանքից հնարավոր չէ պատկերացում կազմել դրանց պատշաճ հիմնավորվածության մասին, մասնավորապես. էջ 80-ում հեղինակը նշում է. «Մեր կարծիքով բյուջետային ծախսերի արդյունքների ընտրության ժամանակ հարկ է ղեկավարվել առավել կարևոր նշանակություն ունեցող հետևյալ պահանջներով...», կետերով ներկայացնելով պահանջները, որոնք չունեն հստակ հիմնավորվածություն՝ մինչդեռ հանդիսանում են գիտական նորոյթի տարր: Գիտական նորոյթ հանդիսացող բյուջետային ծախսերի գնահատման փուլերը, որոնք ներկայացված են էջ 86-87-ում ևս չունեն որևէ հիմնավորվածություն: Նույնը վերաբերում է նաև ատենախոսի կողմից ներկայացրած հետևյալ պնդմանը, մասնավորապես. «Ատենախոսությունում քննարկված հիմնախնդիրներից շատերը Հայաստանի Հանրապետությունում ամբողջական ու համակարգված ուսումնասիրման չեն ենթարկվել..., որով էլ պայմանավորված է ստացված արդյունքների գիտական նորոյթը»: Տվյալ միտքը հստակեցման կարիք ունի, մասնավորապես, թե ո՞ր հիմնախնդիրներին է վերաբերում նշվածը, քանի որ ատենախոսության թեման բազմիցս ուսումնասիրվել է տ.գ.դ., պրոֆեսորներ Վ.Բ.Բոստանջանի, Վ.Լ.Հարությունյանի և այլոց աշխատություններում:
4. Ատենախոսության հեղինակը ներկայացրել է բյուջետային ծախսերի պլանավորման համակարգային մոտեցում, ինչպես նաև բյուջետային ծախսերի հիմնավորվածությունն ապահովելու քայլերի հաջորդականություն: Սակայն պարզ չէ այդ մոտեցումների ձևավորման հիմքը: Գուցե հեղինակը դիտարկել է արտասահմանյան փորձը՝ սակայն դրա մասին չի հիշատակվում աշխատանքում: Նշենք նաև, որ աշխատանքում չկա որևէ անդրադարձ միջազգային փորձին՝ բացառությամբ էջ 60-61-ում ներկայացված աղյուսակ 8-ի:

5. Ատենախոսությունում տեղ են գտել լեզվաոճական բնույթի թերություններ: Առկա են նաև մի շարք տեխնիկական բնույթի թերություններ, մասնավորապես, պահպանված չէ էջերի համարակալման կարգը, և էջերի համարակալումը սկսում է տիտղոսաթերթից՝ 1-ով: Սխալներ են առկա հղումներում, մասնավորապես, էջ 10՝ աղյուսակ 1-ի, էջ 50՝ աղյուսակ 2-ի և շարունակաբար բոլոր աղյուսակներին առնչվող հղումները սխալ տեղերում են: Էջ 53-54-ի աղյուսակ 4-ի հղումն ու վերնագիրը սխալ տեղերում են, էջ 58-ի գծապատկեր 3-ը հղում չունի: Առկա են տպագրական բացթողումներ:
6. Ատենախոսության «Օգտագործված գրականության ցանկ» բաժինը խիստ աղքատիկ է: Աղբյուրների ավելի քան 80 %-ը մինչև 2015 թվականին են և մեծամասամբ ռուսական աղբյուրներ են, մինչդեռ վերջին տարիներին ոլորտին առնչվող բազմաթիվ հետազոտություններ են իրականացվել, որոնք ավելի արդիական են: Ատենախոսը չի անդրադարձել նաև հայ հեղինակներին, ինչպես նաև ատենախոսների կողմից իրականացված ուսումնասիրություններին:

ԵՐՐԱԿԱՑՈՒԹՅՈՒՆ

Անի Արթուրի Աղաբաբյանի «Բյուջետային քաղաքականության կատարելագործման ուղիները ՀՀ-ում» թեմայով ատենախոսությունը կարելի է որակել որպես ինքնուրույն հետազոտություն, որն ուղղված է ՀՀ բյուջետային քաղաքականության կատարելագործման ուղիների բացահայտմանը:

Բյուջետային քաղաքականության կատարելագործման վերաբերյալ առաջարկությունները կարող են օգտագործվել ՀՀ օրենսդիր և գործադիր մարմինների կողմից՝ հանրապետությունում բյուջետային համակարգի զարգացմանը և բյուջետային ծախսերի արդյունավետության բարձրացմանն ուղղված միջոցառումների համալիր մշակման և դրա հետևողական իրականացման ընթացքում: Ստացված արդյունքները կարող են օգտակար լինել նաև նշված համակարգերում աշխատողների համար:

Թեկնածուական ատենախոսության սեղմագիրն արտացոլում է հետազոտության հիմնական բովանդակությունը, արդյունքները և գիտական նորույթը: Հեղինակի կողմից հրապարակած 6 (վեց) գիտական հոդվածները համապատասխանում են հետազոտության ուղղվածությանը, դրա խնդիրներին և ունեն բավարար ընդգրկվածություն:

Անի Արթուրի Աղաբաբյանի «Բյուջետային քաղաքականության կատարելագործման ուղիները ՀՀ-ում» թեմայով ատենախոսությունը և դրան համատեղ կազմված սեղմագիրն ու թվով 6 (վեց) հոդվածների հրապարակումները համապատասխանում են ՀՀ-ում գիտական աստիճանաշնորհման կանոնակարգի 6-րդ և 7-րդ կետերին, ինչպես նաև թեկնածուական ատենախոսություններին ներկայացվող այլ պահանջներին, իսկ աշխատանքի հեղինակը խորհրդում բարեհաջող պաշտպանության դեպքում արժանի է Ը.00.02 «Տնտեսության, նրա ոլորտների տնտեսագիտություն և կառավարում» մասնագիտության գծով տնտեսագիտության թեկնածուի գիտական աստիճանի շնորհմանը:

Ատենախոսությունը քննարկվել է ՀՀ ԳԱԱ Մ. Քոթանյանի անվան տնտեսագիտության ինստիտուտի՝ որպես առաջատար կազմակերպության, «Ատենախոսությունների քննարկման և կարծիքների ներկայացման» հանձնաժողովի նիստում (13.01.2025թ., արձանագրություն թիվ 2):

**ՀՀ ԳԱԱ Մ. Քոթանյանի անվ. ՏԻ
Ավագ գիտաշխատող,
տնտեսագիտության թեկնածու**

Գ.Ա.Հարությունյան

**ՀՀ ԳԱԱ Մ. Քոթանյանի անվ. ՏԻ
գիտաշխատող,
տնտեսագիտության թեկնածու**

Տ.Վ.Շահինյան

*ՀՀ ԳԱԱ Մ. Քոթանյանի ՏԻ ավագ գիտաշխատող, տնտեսագիտության թեկնածու
Գ.Հարությունյանի և նույն ինստիտուտի գիտաշխատող, տնտեսագիտության թեկնածու
Տ.Շահինյանի ստորագրությունների իսկությունը «հաստատում են»՝*

**ՀՀ ԳԱԱ Մ. Քոթանյանի անվ. ՏԻ
գիտ. քարտուղար,
տնտեսագիտության թեկնածու**

Ե.Ա. Հակոբյան

**«13» հունվարի, 2025թ.
Կ. Տ.**

